

ASTEARTEAN BILDUKO DA FINANTZA KONTSEILUA IAZKO KONTUEN LIKIDAZIOA EGITEKO

Bizkaiko defizita nola orekatu aztertuko du Finantza Kontseiluak

■ Eusko Jaurlaritzak eta EAEko hiru diputazioek osatutako Euskal Finantza Kontseiluak datorren asteartean elkartuko da, foru haziendek iaz bildutako diruaren likidazioa egin eta, batez ere, Bizkaiko 8.500 milioi pezetako desorekaren konpentsazioa aztertzeko.

Joseba Aiarza / Bilbo


EAE-KO kontu orokorrekin superabita erakutsiko dute datorren asteartean Euskal Finantza Kontseiluak iazko likidazioa egiten dutenean, Arabak eta Gipuzkoak iazko aurrekontuen gaineko 8.000 eta 5.000 milioi pezeta gehiago bildu baitituzte hurrenez hurren.

Hala ere, mahai gainean Bizkaiko defizita egongo da: herrialde horrek aurreikusitakoa baino 8.500 milioi pezeta gutxiago bildu zituen, eta Finantza Kontseiluaren eginkizun nagusia defizit horren arrazoiak zehaztu eta, hala erabakiz gero, orekatzeko edo berdintzea izango da.

EAEko Gobernuak eta diputazioek osatutako erakunde arteko elkartasun fondoa erabiliko dute Bizkaiko desoreka konpentsatzeko. Fonda 5.200 milioi pezetakoa da, eta baliteke kopuru horretatik zati bat Bizkaiko defizita osatzera zuzentzea. Beste posibilidadetarik bat fondoaren zenbatekoa handitzea da.

Bizkaiko defizitak herrialde horren eta beste bien artean eragindako tentsioa apaldu egin da iazko udazkenetik hona, alde batetik hasieran aurreikusitako 23.000 milioi zuloa azkenik askoz txikiagoa izan delako.

Beste aldetik, Araba eta Gipuzkoako aldundiek onartu dute defizit hori, neurri batean behintzat, arrazoi ekonomikoenatik etor zitekeela, Bizkaiko BEZaren emaitza txarrengatik hain zuzen ere, eta ez Bizkaiko Diputazioaren gestio okerra-



Bizkaiko Foru Aldundiko Ogasun Saila.

MARISOL RAMIREZ

gatik. Kasu horretan bakarrik aplika daiteke elkartasun fondoa.

Finantza Kontseiluak erabakitzen badu defizitaren eragilea Bizkaiko zerga arau ezberdinak izan direla, berriz, ez litzateke fondoaren bidez orekatuko.

Aurtengo aurreikuspenak • Euskal Finantza Kontseiluak iazko urrian zehaztu zituen aurtengo ekitaldirako aurrekontuak. Hiru

foru aldundiek aurten beren kutxetan iaz baino %6 gehiago biltzea aurreikusita dago: Arabak 169.140 milioi pezeta, Bizkaiak 518.316 eta Gipuzkoak 342.086. Guztira 1.029.542 milioi pezeta bilduko dituzte haziendek, beraz.

Herrialde bakoitzak Jaurlaritzari zenbat diru emango dion ere zehaztu zuen Kontseiluak azken bilkuran: Arabak 100.924 milioi, Bizkaiak 334.782 milioi

eta Gipuzkoak 208.353. Orotara 644.059 milioi pezeta emango diote aldundiek Gasteizko Gobernuari.

Portzentaietan, EAEko Administrazioaren diru iturrien %15,66 Arabatik dator, %32,34 Gipuzkoak ordaintzen du eta %51,98 Bizkaia dagokio.

Diru horretatik, Gasteizko Administrazioak 125.211 milioi pezetako kupoa ordainduko dio aurten Estatuari. x

Lanaldi murrizketak enpleguan ondorio «positiboak baina apalak» izango dituela dio aditu batek

■ Lanorduak urritzeaz gainera, produkzio antolaketa aldatzea gomendatu du

Efe/Bilbo

ALBERT RECIO Bartzelonako Unibertsitateko Ekonomia irakaslea Bilbon egon zen atzo, ELAko afilituek antolatutako hitzaldi batean, Recio lanorduak murrizteari buruz hitz egin zuen, eta horrek enpleguan izan dezakeen ondorioei buruz ere aritu zen. Lanbide prestakuntzan enplegu berriak sor daitezkeen alorrean garrantzi berezia ematea gomendatu zien Recio sindikatukoiei, «lanorduak gutxituz gero, lan kualifikatuetan dauden beharrrak oztopo izan daitezkeela». Izan ere, lanorduak ez urritzeko enpresa nagusiek azaldu ohi duten argudioetako bat horixe da, lan kualifikatuetarako langile prestatuak ezin topatzea.

Bestalde, zuhur agertu zen Recio lanorduak gutxitzeak ekar ditzakeen ondorioak aztertzerakoan. «Ondorio positiboak izango lituzke, baina apalak», azpimarratu zuen Bartzelonako Unibertsitateko aditua. «Lanorduen banaketak enplegua sor dezan nahi badugu, produkzio antolaketan ere aldaketak sartu behar ditugu».

Lanaldi laburreko lan kontratuei buruz mesfidati agertu zuen Recio. «Gehienbat emakumei egingo zaie kontratu mota hori, eta arriskutsua litzateke». Oro har, gaur egun lan baldintzak nabarmen kaskartu direla ohartarazi zuen Bartzelonako Unibertsitateko irakasleak ELAko afiliatuekin izan zuen solasaldian. x

Iaz 63.830 auto berri erosi zituzten Hego Euskal Herriko herritarrek

■ Araba, Gipuzkoa eta Bizkaian igoera %18koa izan da 1997. urtean

Erredakzioa / Donostia


AUTO berrien kopuruak nabarmen egin zuen gora aurreko urtean Hego Euskal Herrian. 1997an 63.830 auto berri matrikulatu ziren Hego Euskal Herrian. EAEko probintzietan 48.356 auto berri matrikulatu ziren iaz, 1996an 41.056. Nafarroan 15.474 auto berri atera ziren errepideetara iaz, 1996an baino ia 1.200 auto gehiago. 1996ko emaitzekin alderatuta, beraz, Nafarroan auto matrikulazioak %8,26 egin du gora 1997an; eta EAEko probintzietan portzentaia hori halako bi baino gehiago: %17,78 hain zuzen ere.

Espainian ere auto berri kopuruak gora egin du 1997an, betiere 1996ko emaitzekin alderatuta. Orotara, milioi bat auto berri matrikulatu ziren Espainian, aurreko urteko emaitzekin alderatuta %11,3 gehiago. Izan ere, 1996an 910.928 auto berri matrikulatu ziren Espainian.

Emitzok Espainiako auto eta kamioi ekoizleen elkarteak, ANFACek, zabaldu zituen atzo. Auto berrien kopurua familien kofiantza tasaren aldagaietako bat da, eta epe laburrera ekonomiak hobera egingo duenean gerta ohi da auto salmenta igoera. Horixe da ANFACeko ardu-

radunek atzo zabalduetako emaitzekin batera azpimarratu zutena.

Salmenta igoera handiena Murtzian izan da. Autonomia erkidego horretan auto berrien kopuruak %22 egin du gora; eta igoera apalena Errioxan izan da. Errioxako Autonomia Erkidegoan %3,4 baino ez da igo auto salmenta 1996ko datuekin alderatuta. Madrilen ere auto salmenta oso gutxi igo zen, Errioxan beste gutxi gorabegera. Galizian, Andaluzian, Balearretan, Kanariar Uharteetan eta Aragoi ere auto berrien salmenta batenaz bestekoaren azpitik igo da. x



EAEko probintzietan iaz %17,78 egin zuen gora auto berrien matrikulazioak.

JAGOBA MANTEROLA